

Pravilnik o programskoj saradnji sa međunarodnim organizacijama

Na osnovu člana 8. Zakona o Centru za edukaciju sudija i tužilaca u Federaciji Bosne i Hercegovine ("Službene novine Federacije Bosne i Hercegovine", br. 24/02, 40/02, 59/02 i 21/03), i člana 16. Statuta Centra za edukaciju sudija i tužilaca u Federaciji Bosne i Hercegovine ("Službene novine Federacije Bosne i Hercegovine", br. 62/04 i 29/05), Upravni odbor Centra za edukaciju sudija i tužilaca u Federaciji Bosne i Hercegovine, na 5. sjednici održanoj 19. marta. 2014. Godine, na prijedlog direktora Centra za edukaciju sudija i tužilaca u Federaciji Bosne i Hercegovine, donijelo je

PRAVILNIK O PROGRAMSKOJ SARADNJI SA MEĐUNARODNIM ORGANIZACIJAMA

I. UVODNE ODREDBE

Predmet

Član 1.

Ovim Pravilnikom utvrđuju se načini zaključivanja, izmjene i prestanka važenja Sporazuma o programskoj saradnji sa međunarodnim organizacijama koje učestvuju u edukaciji nosilaca pravosudnih funkcija u Federaciji Bosne i Hercegovine (u daljem tekstu: Federacija BiH).

Pojam programske saradnje

Član 2.

Programska saradnja sa međunarodnom organizacijom podrazumijeva saradnju sa jednom ili više međunarodnih organizacija na realizaciji jedne ili više obuka koje se implementiraju u okviru programa početne obuke i programa stručnog usavršavanja Centra za edukaciju sudija i tužilaca u Federaciji Bosne i Hercegovine (u daljem tekstu: Centar), regulisanu pisanim sporazumom o programskoj saradnji, koji Centar zaključi sa jednom ili više međunarodnih organizacija koje podržavaju obuku nosilaca pravosudnih funkcija u Federaciji BiH.

Sve odredbe ovog Pravilnika koje se odnose na jednu međunarodnu organizaciju mogu se odnositi i na više međunarodnih organizacija, koje zajednički sudjeluju u organizaciji jedne ili više obuka.

Radi izvršavanja zaključenog sporazuma o programskoj saradnji Centar može zaključiti ili usvojiti protokole, zapisnike i druge akte. Ovim aktima Centar ne može preuzeti nove obaveze.

II. POSTUPAK ZAKLJUČIVANJA SPORAZUMA O PROGRAMSKOJ SARADNJI

Pokretanje postupka za vođenje pregovora i zaključivanje sporazuma o programskoj saradnji

Član 3.

Postupak za vođenje pregovora i zaključivanje sporazuma o programskoj saradnji može pokrenuti međunarodna organizacija, po sopstvenoj inicijativi ili na prijedlog organa državne uprave u čijoj nadležnosti pretežno spadaju pitanja koja se uređuju sporazumom.

Prijedlog za vođenje pregovora i zaključivanje sporazuma o programskoj saradnji

Član 4.

Postupak za vođenje pregovora i zaključivanje sporazuma o programskoj saradnji pokreće međunarodna organizacija, upućivanjem direktoru Centra prijedloga za vođenje pregovora i zaključivanje sporazuma o programskoj saradnji.

Prijedlog za pokretanje postupka za vođenje pregovora treba da sadrži naročito:

- a) ustavni i zakonski osnov za organizovanje obuke;
- b) razloge zbog kojih se predlaže zaključivanje sporazuma;
- c) analizu procjene potreba za obukom;
- d) osnovna pitanja o kojima će se voditi pregovori i načelne stavove međunarodne organizacije u vezi sa sadržajem programske saradnje;
- e) procjenu finansijskih sredstava potrebnih za izvršenje sporazuma i način njihovog obezbjeđivanja i
- f) prijedlog edukatora.

Član 5.

Međunarodna organizacija je obavezna da navede okvirni datum održavanja obuke. Tačan datum je obavezna odrediti i o njemu obavijestiti Centar odmah. Nakon zaključenja sporazuma o programskoj saradnji, a prije potvrđivanja godišnjeg programa početne obuke i programa stručnog usavršavanja Centra od strane Visokog sudskog i tužilačkog vijeća Bosne i Hercegovine.

Uz prijedlog iz stava 1. ovog člana prilažu se i garancije finansijera predložene obuke, ako one postoje u pisanom obliku.

Delegacija za vođenje pregovora

Član 6.

Direktor Centra utvrđuje osnovu za vođenje pregovora i zaključivanje sporazuma o međunarodnoj saradnji i određuje delegaciju za vođenje pregovora.

Vođenje pregovora

Član 7.

Delegacija Centra određena za vođenje pregovora ne može u toku pregovora odstupati od stavova utvrđenih u osnovi.

Ako u toku pregovora međunarodna organizacija ne prihvati stavove utvrđene u osnovi ili predloži da se razmatraju pitanja o kojima nisu zauzeti stavovi u osnovi, delegacija Centra će zatražiti nove stavove Direktora, a po potrebi i odložiti pregovore.

Direktor će po hitnom postupku utvrditi stavove koje u toku pregovora zatraži delegacija Centra.

Izveštaj o pregovorima

Član 8.

Po završenim pregovorima, delegacija Centra podnosi Direktorcu izvještaj o toku pregovora i usaglašeni (parafiran) tekst sporazuma o programskoj saradnji.

Ako Direktor ocijeni da je usaglašeni tekst sporazuma o programskoj saradnji u skladu sa utvrđenom osnovom, potpiše takav sporazum.

U slučaju da pregovori nisu uspješno okončani, delegacija Centra će u izvještaju posebno obrazložiti razloge neuspjeha pregovora i predložiti dalje postupanje.

Dostavljanje potpisanog sporazuma o međunarodnoj saradnji

Član 9.

Centar, u roku od 15 dana od dana potpisivanja dostavlja tekst potpisanog sporazuma o međunarodnoj saradnji, sa cjelokupnom dokumentacijom, međunarodnoj organizaciji kao jednoj od strana sporazuma.

III. PODRŠKA PROJEKTIMA

Odlučivanje o projektnim prijedlozima

Član 10.

Upravni odbor Centra će razmotriti svaki projektni prijedlog.

U svrhu razmatranja, projektni prijedlog treba posebno da sadrži elemente navedene u stavu 2. člana 4. ovog Pravilnika.

O odluci Upravnog odbora Centra će podnosilac projektnog prijedloga će biti blagovremeno obaviješten.

IV. IZMJENE I PRESTANAK VAŽENJA SPORAZUMA O PROGRAMSKOJ SARADNJI

Izmjene sporazuma o programskoj saradnji

Član 11.

Sporazum o programskoj saradnji može se mijenjati u skladu sa odredbama samog sporazuma i Zakona o obligacionim odnosima Federacije Bosne i Hercegovine.

Na postupak izmjene sporazuma o međunarodnoj saradnji shodno se primjenjuju odredbe ovog Pravilnika koje se odnose na zaključivanje sporazuma o programskoj saradnji.

Član 12.

Sporazum o programskoj saradnji prestaje da važi u skladu sa odredbama samog sporazuma i Zakona o obligacionim odnosima Federacije Bosne i Hercegovine.

V. ZAVRŠNE ODREDBE

Stupanje na snagu

Član 13.

Ovaj pravilnik stupa na snagu danom donošenja i objavit će se na internet stranici Centra.

Broj: 05-38-203-09/14
Datum: 19.03.2014.

